

本經序疏要

卷一之二



要本經序疏

同治癸酉反經堂重刊



本經序疏要目錄

卷一

療風通用一

風眩二

頭面風三

中風腳弱四

久風溼痹五

賊風攣痛六

暴風瘙癢七

傷寒八

大熱九

勞復十

溫瘧十一


卷二

中惡十二

霍亂十三

轉筋十四

嘔啞十五



大腹水腫十六

腸澼下痢十七

大便不通十八

小便淋十九

小便利二十

溺血二十一

卷三

消渴二十二

黃疸二十三

上氣欬嗽二十四

嘔吐二十五

痰飲二十六

宿食二十七

腹脹滿二十八

心腹冷痛二十九

腸鳴三十

卷四

心下滿急三十一

心煩三十二

積聚癥瘕三十三

鬼疰尸疰三十四

驚邪三十五

癩癧三十六

喉痛三十七

噎痛三十八

卷五

鰓三十九

齒痛四十

口瘡四十一

吐唾血四十二

鼻衄血四十三

鼻齕四十四

耳聾四十五

鼻息肉四十六

目赤熱痛四十七

目膚瞤四十八

聲暗啞四十九

面疔炮五十

髮禿落五十一

滅癥五十二



金創五十三

卷六

踈折五十四

瘀血五十五

火灼五十六

癰疽五十七

惡瘡五十八

漆瘡五十九

癭瘤六十

癩瘡六十一

五痔六十二

脫肛六十三

蠶六十四

虻蟲六十五

寸白六十六

卷七

虛勞六十七

陰痿六十八



陰瀆六十九

囊溼七十

洩精七十一

好眠七十二

不得眠七十三

腰痛七十四

婦人崩中七十五

月閉七十六

無子七十七

安胎七十八

墮胎七十九

難產八十

卷八

產後病八十一

下乳汁八十二

中蠱八十三

出汗八十四

止汗八十五

驚悸心氣八十六

肺痿八十七

下氣八十八



蝕膿八十九

女人血閉腹痛九十

女人血氣歷腰痛九十一

女人腹堅脹九十二

解百藥及金石等毒九十三

服藥食忌九十四

凡藥不宜入湯酒九十五

序曰班氏藝文志謂醫經者原人血脈經絡骨髓陰陽表裏以起百病之本死生之分而用度鍼石湯火所施調百藥齊和之所宜經方者本草石之寒溫量疾病之淺深假藥味之滋因氣感之宜辨五苦六辛致水火之齊以通閉解結反之於平蓋自是醫經經方遂分連絡之者本草經則其樞紐矣乃志不載其書然帝紀平帝元始五年徵天下通知逸經古記天

文厯算鐘律小學史篇方學本草及以五經論語
經爾正教授者所在爲駕一封軺傳遣詣京師至者
數千人樓護傳護少隨父爲醫長安誦醫經本草
術數十萬言世不忽其書故習而傳之者代不乏人
其得至今存者惟梁貞白先生陶氏書爲最古今案
其書既歷載本經總序於前復患諸藥一種雖主數
病而性理有偏著立方或致疑混赴急抄撮恐不皆
得研究故將本經序大病之主已下一節循其所列
剖而析之分爲八十三項件繫主治藥於下方贅之
序末是陶氏實注本經而得本經與醫經經方連絡
交會處矣予治仲景書旣由不明藥物主病之所以

然用力本經有本經疏證續疏之作矣繼治孫真人
王太守書覺與仲景書猶未相承接遂立志究竟
名古今相沿之準病證彼此不侔之故而證以藥
主治之由得是編以爲鵠反覆尋繹參互研訂然
知一證也隸之此病則屬虛隸之彼病更屬實一藥
也投之彼病則逐實投之此病反補虛於仲景書以
此推其緒於孫真人王太守書以此要其歸蓋自是
而漢人唐人醫學醫經經方旨趣得連爲一貫焉篇
中附北齊徐氏唐蘇氏蜀韓氏宋唐氏所增其精詣
幾與陶氏埒而徐氏所續九項實有裨補證明之功
亦隨例詮釋而不削也道光二十年九月五日武造

鄒澍序

貞白先生名宏景梁時隱居茅山自號華陽隱
實始集別錄附入本草經中徐氏名之才北齊
書令封西陽王著藥對蘇氏名恭顯慶中與長孫
無忌許敬宗等修定本草李勣表上之今名唐本
草韓氏名保昇孟蜀重廣唐本草并稍增注釋名
蜀本草掌氏名禹錫宋嘉祐時奉詔重修本草名
嘉祐補江本草唐氏宋大觀時蜀人取諸家本草
彙而集之竝采入經史中言醫事隨類附入名證
類本草





南京中醫藥大學圖書館版權所有

本經序疏要卷之一目錄

序例

療風通用一

風眩二

頭面風三

中風腳弱四

久風溼痹五

賊風攣痛六

暴風瘙癢七

傷寒八

大熱九

勞復十

溫瘧十一





南京中医药大学图书馆版权所有
1964

本經序疏要卷之一

武進鄒澍學

序例

謹按諸藥一種雖主數病而性理亦有偏著立方之日
或致疑混復恐單行經用赴急抄撮不必皆得研究今
宜指抄病源所主藥名便可於此處療若欲的尋亦兼
易解其甘苦之味可略有毒無毒易知惟冷熱須明今
依本經別錄注於本條之下其有不宜入湯酒宜入湯
酒者亦條於後

唐本以朱點為熱墨點為冷無點為平多有差悞宋人於逐藥之下依本經別

錄而注焉

凡藥稟賦絕類則功用廣博然推其端緒要有歸著



譬如麻黃其異在所產之地冬不積雪則其歸著在

鼓發陽氣衝散陰邪故凡束縛難伸之風

賊風 攣痛

蔽銅

盛熱之寒

傷寒

乍揚更抑之熱

溫瘧

迫隘不順之氣

上氣 欬逆

皆所能療誠得謂一種可主數病矣然不能治筋骨

懈弛之風陽氣漏泄之寒鼓蕩不羈之熱隨火冲逆

之氣稽其效曰出汗亦僅能令霾中見曉不能令旱

處致霖曰下氣卻祇能於橫中闢道不能於直下鑿

渠又可謂性理有偏著否耶太陽病項背強几几汗

出惡風者桂枝加葛根湯反無汗惡風者葛根湯用

麻黃不用麻黃其別在汗欬而脈浮者厚朴麻黃湯

沈者澤漆湯用麻黃不用麻黃其別又在脈立方之

日不洞曉是理易致疑混陶氏序肘後百一方云嘗
居閑佚乃可披檢方書或從祿外邑將命遐征或宿
直禁闈晨宵隔絕或急速戎陣城柵嚴阻忽遇疾厄
拱手相向搢紳君子且然何況貧家野居能不向單
行經用赴急抄撮以求活此時而欲研究方書探討
經義證其非是豈特不能且不暇矣爲此編者筆墨
省減病名旣得原委藥味遂可別擇循證求病因病
得藥從藥檢宜誠可謂探之囊笥庸豎均可成醫者
嗟夫世風遞易遵守殊規徒知寒可攻熱熱得療寒
補概益虛泄能除滿欲適燕而北其轅固不爲非是
殊不知自吳直往定抵海濱從滇徑徂輒歸西域遂

致軻發坦途詣終茅塞惟古人所指示曲盡攸宜縱
使羊腸鳥道循是過征必可屆四通八達此昔日
僻徑卽今日之廣衢而今日所謂廣衢乃金元已來
所別闢也甘苦之義其旨淵微冷熱之宜其情直
注此於下相得益彰意簡要而用專精矣

療風通用

防風溫

○主大風頭眩痛風行周身骨節疼痺煩滿

防己平

溫○療風腫及中風手足攣急

秦艽平

微溫○療風無問久新通身攣急

獨活平

微溫○治中諸風溼冷奔喘逆氣皮肌苦癢

論

藥性



芎藭温 ○主中風入腦頭痛寒痺

羌活平微温 ○主賊風失音不語多癢血癩

麻黃温微温 ○治身上毒風癩痺皮肉不仁

藥性論 藥性論

蜀本 鹿藥温 ○主風血去諸冷益老起陽

天麻平 ○治諸風溼痺四肢拘攣

海桐皮平 ○治腰脚不遂頑痺腿膝疼痛

海藥

蚬祁

威靈仙温 ○主諸風宣通五藏去腹内冷滯心隔痰

水

藥對 楓香平治癩癢毒臣

薏苡仁微寒主風筋攣急屈伸不得君 ○主風溼痺



下氣

萎蕤平治中風暴熱不能轉動者君

巴戟天微溫治風邪氣君○治一切風華日

側子大熱治溼風大風拘急使○治冷風溼痺大風

筋骨攣急藥性論

鼈頭血治口僻臣

山茱萸平治風氣臣○主頭風風氣去來鼻塞目黃

耳鳴面皯

淡竹瀝及葉大寒主風癘疾臣

牛膝平主風攣急君

細辛溫主風攣急君○主風溼痺痛虎肌



菖蒲温君并桂心大熱吹鼻中主風瘖君

梁上塵微寒以小豆大吹鼻中治中風使

葛根平治暴中風臣○治金創中風瘞欲死者煮汁

之口噤不開多服生葛根自愈

肘後

白蘚皮寒治風不得屈伸風熱臣○主頭風○治一

切風痺筋骨弱乏通小腸水氣

日華

白薇大寒治暴風熱四肢急滿不知人臣

證類

天藹冬平大寒○主諸暴風溼偏痺強骨髓

附子温大熱○腰脊風寒

杜若微温○主風入腦戶頭腫痛多涕淚出

麥藁冬平微寒



羚羊角温應作寒微寒○治一切熱毒風攻注藥性論主

中風筋攣附骨疼痛生摩和水塗腫上孟詵

犀角寒微寒○散風毒藥性論治中風失音熱毒風

藁本温微寒○除風頭痛○能治一百六十種惡

鬼疰流入腰痛冷能化小便通血藥性論

天雄温大温○主大風寒溼痺歷節痛拘攣緩急

黃芪微温○主大風癱疾

蒺藜子温微寒○治諸風癰瘍破宿血藥性論

藁耳實温葉微寒○主風頭寒痛風溼周痺四肢拘

攣痛惡肉死肌

菊花平○主四肢游風利血衄日華



狗脊平微温○治男子女人毒風輭脚邪氣溼痺藥性

論

莽艸温○主風頭癢可用沐勿令入眼

柏子仁平○主風溼痺○治風潤皮膚日華

蔓荆子微寒微温○治賊風藥性論

當歸温大温○主惡血内塞中風痙汗不出

烏喙微温○主風溼寒熱歷節掣引腰痛不能行步

萆薢平○主冷風痛痺腰腿不遂手足驚掣藥性論

躑躅温○主賊風在皮膚中淫淫痛

欒荆温○主大風頭面手足諸風

辛夷温○主風頭腦痛



小天蓼温○主一切風虛羸冷手足痺疼無論老幼
輕重浸酒及煮汁服之

乾蝎温○療諸風癱瘓及中風半身不遂口眼喎斜
語澀手足抽掣

烏蛇温○主諸風瘙癢瘡皮膚不仁頑癬

天南星温○主中風除痰麻痺下氣破堅積

烏頭温大熱○主中風惡風洗出汗除寒溼痺

白花蛇温○主中風溼痺不仁筋脈拘急

酸棗仁平○主筋骨風研末作湯服之

藥性論

鼠粘子平○除風傷

牛黃平○療中風失音口噤

日華

枳殼微寒○主風癢麻痺通利關節

牡荊子微寒平○根主心風頭風肢體諸風解肌發

表唐本引
別錄

風之病人也大率有三有感而即發者有既入人身
盤旋氣血間久乃成病者有人身陽氣自應風化爲
患者感而即發如傷寒溫熱時氣等類是已既入人
身盤旋氣血間久乃成病如風眩頭面風等類是已
此篇大旨爲諸病提綱挈領獨於人身陽氣自應風
化爲病者加詳何謂人身陽氣自應風化蓋陰性凝
聚陽性發散陰聚之陽必散之則陰陽固互相爲用
矣然不有陰氣凝聚陽在內不得出奮擊爲雷霆者



乎不又有陰氣凝聚陽在外不得入周旋不舍而爲
風者乎是故風者陽氣之變眚也其卦爲巽巽者
初凝而完聚陽始退而矯強強者力不能散聚之
密聚者偏不受強之提撕於是相搖相曳相摩相盪
而周旋不舍焉而抑揚飄驟焉必得雨而風乃息雨
固陰陽之旣翕而化焉者也故夫入身之陽在上則
欲其與陰化而下歸在下則欲其化陰而上出設使
在上不與陰化在下不能化陰斯陽亢無以升降於
是爲出柙之虎失繫之猿而窮而無歸咆哮狡獪百
變不已窺篇中大意陽之鬱者伸之陽之勁者緩之
陰之結者破之陰之竭者濡之隨其所在而澤陽因

其所近而招陰增膏以定火之炮漑水以拯木之枯
總不出用陰和陽一語就病以徵藥卽藥以審病續
紘膠擾之中未始不可隨處洞徹源委也

風眩

菊花平 ○主風頭眩腫痛目欲脫淚出

飛廉平 ○主頭眩頂重

躑躅温

虎掌温微寒 ○主風眩 ○主風眩目轉

藥性論

杜若微温 ○主風入腦戶頭腫痛多涕淚出眩倒目眈

眈

茯神平 ○療風眩風虛

茯苓平

白芷温 ○主頭眩目癢

鴟頭平 ○主頭風眩顛倒癩疾

蜀本 伏牛花 ○主風眩頭痛

藥對 芎藭温臣

防風微温主頭眩顛倒火風溼痹臣 ○主大風頭痛

惡風

人蘘微温主頭眩轉君

兔頭骨平臣 ○主風眩巔疾

證類 蔓荆實微寒 ○主風頭痛腦鳴目淚出

薯蕷温平 ○主風頭眼眩



尤溫○主風眩頭痛目淚出

靡無溫○頭中久風風眩

陽在上不與陰化在下不能化陰均之風也何以在
下之風有腸風胃風則爲飧洩也又有風秘風燥則
爲便艱也在上之風有卒仆無知痰涎湧逆也又有
風頭眩痛涕淚唾淚也此不特有淺深之殊抑亦有
開閉之異蓋陰之錮者陽必鬱則陰固背陽而陽亦
爍陰也陰之漏者陽必動則陰固背陽而陽復迫陰
也故夫閉者益閉開者愈開閉者之致斃是陰竭陽
亡開者之及危乃陰離陽決雖然閉之弊斷有甚於
開試思風頭眩痛非卒倒無知之輕者乎痰涎湧逆

非涕洟唾淚之甚者乎然參釋前篇與此篇義旨又有以知閉者宜醒陰導陰以濟陽開者宜順陰和陰以平陽爲同中之異矣順陰和陰以平陽奈何試以燭炮則淚垂波蕩則舟旋證之夫燭炮淚垂者咎在陽而不在陰波蕩舟旋者咎在陰而不在陽但風息則非特燭不炮卽波亦不蕩矣是豈不可并合而論然不有膏不堅而燭垂淚者乎不有水激搏而舟旋轉者乎水激搏而舟旋轉是地勢之傾欹也膏不堅而燭垂淚是氣候之過暖也療風無藉乎崇土此篇偏疊隸以淺尤薯蕷療風何資於滲利此篇乃竝列以茯苓芩而菊花之苦平而降蔓荊之辛寒而升

朮之苦温而守性殊楚越而收淚之功則同其可
順陰氣使就下和陰氣使歸壑平陽氣使甯謐者
耶攷仲景治眩多著意於水與飲故苓桂朮甘湯
武湯五苓散澤瀉湯均不得謂爲治風則風眩之必
兼治水從可識矣

頭面風

芎藭温 ○除面上游風去來目淚多涕唾忽忽如醉

薯蕷温平 ○主頭面游風

天雄温 大熱 ○療頭面風去來疼痛

山茱萸平 微温 ○除面上瘡主能發汗

藥性論

莽艸温

辛夷温 ○治面腫引齒痛

牡荊子温

蔓荊子微寒平温 ○久服令人光澤脂緻

藁本温微温微寒 ○長肌膚悅顏色辟霧露潤澤可作

沐藥面脂

蘼蕪温

藁耳温

蜀本何首烏微温 ○療頭面風

藥對阜茨温主風眩使

巴戟天微温主頭面風君 ○療頭面游風

白芷温主頭面風臣 ○可作面脂



防風溫主頭面來去風氣臣

蜂子微寒微溫○主面目黃久服令人光澤好顏色

類證
杜若

葉耳實溫葉微寒

頭面風亦在上之風也其主治多用溫升核以陽在上不與陰化之義相悖否夫豈知頭面風固在上其所以然卻在下哉靈樞邪氣藏府病形篇黃帝曰首面與身形屬骨連筋同血合氣天寒則裂地凌冰或手足懈惰然而其面不衣何也岐伯對曰十二經脈三百六十五絡其血氣皆上於面而走空竅其精陽氣上走於目而爲睛其別氣走於耳而爲聽其宗氣

上出於鼻而爲臭其濁氣出於胃走脣舌而爲味其
氣之津液皆上燻於面而皮又厚其肉堅故大熱甚
寒不能勝之也是豈非其末在上其本在下歟巢氏
曰頭面風者諸陽經脈爲風所乘也諸陽經脈上走
於頭面運動勞役陽氣發洩腠理開而受風謂之首
風是豈非招風取中之故歟觀篇中一則曰游風再
則曰去來詎非其病旣不常在亦不竟除來本無期
去亦無跡其來也或目淚或涕唾多或忽忽如醉或
頭痛或生瘡或腫或不光澤或面目黃色其去也倏
然若失則其陽氣暫弛而病生稍張而病罷猶可不
使陽化在下之陰令上出而爲光澤脂緻以長肌膚

潤顏色乎是其於風眩一則水乘風以上激一則
委頓而不上炎烏可同日語也然機關既在下行
不病於下而病於上夫適所謂陽不固而非陽衰
衰則病於下矣然至用天雄不可不謂陽衰是則有
說焉夫遠行勞力汗出於腎經有明文運動勞役而
至陽氣發泄不能不謂傷自腎始而陽之發泄有多
端其已發而未泄者則因其上而越之矣若已發已
泄繼踵而不止慄悍而難禁者能不按而收之乎若
發泄過甚根柢將傾者能不因其衰而彰之乎夫固
難以一途論也充陽以運陰滯散火以靖陽氣息風
以奠陽位和陰以達陽光名曰治陽實以治陰中之



陽名曰治下實以使自下而上推其變而會其元古
人之用意密矣哉

中風腳弱

石斛平○主腳膝疼冷痺弱

石鍾乳温○療腳弱疼冷下焦傷竭

殷孽温主脚冷疼弱

孔公孽温主腰冷膝痺毒風

藥性論

石硫黃温大熱○主脚冷疼弱無力

附子温大熱○脚弱冷疼不能行步

以寒○主虛勞喘吸兩脚冷疼

芥藿微寒○腰脊强脚痺除風邪留熱

五加皮溫微寒○療躄小兒不能行女人腰脊痛兩

疼痹○主賊風傷人軟腳齩腰藥性論

竹瀝大寒

大豆平豆黃主溼痹膝痛孟詵

天雄溫大溫○主關節重不能行步除骨間痛

側子大熱○風痹歷節腰脚疼冷

藥對 木防己平治攣急臣○治男子肢節中風毒風不語

主散結氣擁腫藥性論

獨活微溫主脚弱君○主手足攣痛勞損藥性論

松節溫治脚膝弱君○主久風風虛脚痹疼痛

牛膝平治痛痹○治腰膝軟怯冷弱藥性論



南京中醫藥大學圖書館版權所有

類證
胡麻平

中風腳弱之候與頭面風適相對照其治自應推
上之陽回入陰中以強之已耳乃復列入性寒通利
者過半是何故歟夫既曰弱則非拘急攣縮可比
甚有似於痿既曰腳則非頭項身體盡然又不全係
於風何則風性善行不能但駐一處弱者筋弛而不
束骨也生氣通天論曰溼熱不攘大筋縵短小筋弛
長縵短爲拘弛長爲痿又曰有傷於筋縱其若不容
痿論曰心氣熱則下胝厥而上上則下胝虛虛則生
胝痿樞折挈筋縱而不任地果爾則行溼以去熱使
陰得以上濟通血以導氣使陽得以下蟠而自上下

下之化通矣又烏得但恃引火回陰之一端耶然則
直曰痿可矣何得命之曰中風夫風固陰性凝聚
在外不得入則與之周旋不舍而爲者耳特凝聚之
中果何氣哉試思氣交之令天氣迷蒙地氣抑遏土
木生潤階礎流漿非陰之凝聚溼與熱耶而旋即雷
雨洊至必首御以風是風非溼與熱凝聚而生者耶
乃是時也膠柔弦弛任是堅脆之物必轉溼潤焉則
所謂中風腳弱非飄揚淒掄之風亦非掀天刮地之
風直是醞釀於溼與熱中欲出而未得出欲息而不
得息者彼痿則雖間亦有挾溼如所謂肉痿者餘則
均係熱灼陰消皮毛血脈肌肉筋膜骨髓直乾枯焉

耳此風與痿之所攸分卽本書不載痿之由已再覈
篇中凡性溫者所主必云冷云痛間有性平性寒者
所主亦有疼與冷焉是其轉移陰陽之浮滯散發
陽之抑鬱暢達生氣之留連撥正經脈之違逆具
化機力專效捷自有常理於中而非可以常情測者
尤宜具眼觀也

久風溼痹

菖蒲溫平○主風寒溼痹

茵芋溫微溫○諸關節風溼痹痛

天雄溫大溫○主大風寒溼痹歷節痛拘攣緩急

附子溫大熱○主寒溼踈蹇拘攣膝痛

烏頭温大熱○除寒溼痹

細辛温○主風溼痹痛死肌

蜀椒温大熱○逐骨節皮膚死肌寒溼痹痛

牛膝平○主寒溼踠痹

天蓴冬平大寒○主諸暴風溼偏痹

朮温○主風寒溼痹

丹蔘微寒○除風邪留熱

石龍芮平○主風寒溼痹心煩邪氣

茵陳蒿平微寒○主風溼寒熱邪氣

松葉温○主風溼瘡生毛髮

松節温○主百節久風



側子大熱○主風痺歷節

藥對 薏苡仁微寒主中風溼痺筋攣君

躑躅温治風使○主賊風在皮膚中淫淫痛

柏子仁平主風溼痺君○益氣除風溼痺

獨活微温治風四肢無力拘急君

證類 天蓼冬平大寒

菴耳實温葉微寒○主風溼周痺四肢拘攣痛

蔓荆子微寒微温○主溼痺拘攣

痺之訓為冷疾荀子解蔽篇注為溼病說文則風者其冷溼之

所化歟是蓋不然若本無風而風為冷溼所化則痺

論不得云有風氣勝者矣然則此篇但云風溼而不



云寒則寒者得無風溼之所化歟是又不然痹論云
風寒溼三氣雜至合而成痹則爲病之由固三者兼
受矣曰雜至謂錯雜而至不拘孰先孰後也曰勝
其氣較之他氣爲盛也曰行曰痛曰著則病之情狀
已該其中矣然則篇中以緩急淫淫周痹爲風勝以
拘攣歷節偏痺爲溼勝以痛爲寒勝而治風以散治
寒以熱治溼以滲可矣何爲乎寒熱雜陳通補互用
豈痺亦有屬虛屬熱者哉夫風爲陽寒爲陰溼爲陽
中之陰則邪既有陰陽矣何況人身亦有體質之不
齊陰陽之偏旺氣候之勝復而感觸動盪於其間豈
能執一以爲則而無藏府之違從氣血之消長耶故

曰痛者寒氣多也病久入深營衛之行澀經絡不疏
則不通皮膚不營則爲不仁陽氣少陰氣多與病相
益故爲痺寒陽氣多陰氣少病氣勝陽遭陰故爲濕
熱其逢溼甚者陽氣少陰氣盛兩氣相感故汗出而
濡也又曰痺在於骨則重在於脈則血凝不流在於
筋則屈不伸在於肉則不仁在於皮則寒具此五者
則不痛凡痺之類逢寒則急逢熱則縱據此則又豈
得按其始以定治乎然則何以不及五藏諸痺之治
夫篇中除煩平喘通利血脈養營定驚伸引筋骨下
氣止嘔之物亦何嘗闕顧謂不治五藏痺耶或謂伸
景云風之爲病當半身不遂或但臂不遂者此爲痺

其辨嚴矣何以篇中治痹之物盡治風之物夫此則邪之力有大有小耳譬諸寇盜力大者徑情直行無敢與忤力小者誘引相得萃於一隅然正其治化端通其出入之道招徠其脅從殲戮其巨魁剿大剿小一也焉用別乎特風多猝然而至痹每積漸乃成故以久風溼痺標名非謂更有驟風溼痺相對照也

賊風攣痛

茵芋温微温○療諸關節風溼痺痛

附子温大熱○主寒溼踈臂拘攣膝痛

側子大熱○治冷風溼痺大風筋骨攣急

麻黃温微温○主五藏邪氣緩急風脅痛

本經序疏要
一賊風攣手痛



芎藭温 ○主寒痹筋攣緩急

杜仲平温 ○治腎勞腰脊攣偻日華

葶藶平 ○主腰背痛強骨節風寒溼周痹

狗脊平微温 ○主腰背強機關緩急周痹

白鮮皮寒 ○主溼痹死肌不可屈伸

白芨平微寒 ○主賊風鬼擊痲緩不收

藁耳温 ○主風溼周痹四肢拘攣痛

豬椒温 ○主風寒溼歷節疼

石斛平 ○逐皮肌風痲藥性論

漢防己平温 ○主中風手足攣急

靈樞賦風篇黃帝曰夫子嘗言賊風邪氣令人病今



有不離屏蔽不出室穴卒然病者何也岐伯對曰此皆嘗有所傷於溼氣若有所墮墜惡血留於內而去卒然喜怒不節飲食不適寒溫不時腠理閉而通其開而遇風寒則血氣凝結與故邪相襲而爲寒痹其有熱則汗出汗出則受風雖不遇賊風邪氣必有因加而發焉帝曰夫子之所言皆病人所自知也其毋所遇邪氣又毋怵惕之所志卒然而病者何也惟因有鬼神之事乎岐伯對曰此亦有故邪留而未發因而志有所惡及有所慕血氣內亂兩氣相搏其所從來者微視之不見聽而不聞故似鬼神據此則賊風者卒然而發正與風溼痹之積久乃成者相反

矣顧賊風未必盡爲攣急攣急未必盡由賊風則賊
風攣急者其如飛尸如鬼擊不假有因卒然而發
攣急歟然前此種種諸風篇未必竟無攣急此篇
種諸證又未嘗皆攣急謂前此諸攣急非卒然而
則可謂今此卒然得者雖不攣急亦得命爲賊風攣
急可乎然覈此篇僅痹緩不收皮肌風痹兩者無攣
急餘則不可屈伸機關緩急緩急風脅痛關節風溼
痹痛皆攣急也矧痹緩不收上明著賊風鬼擊耶惟
卒然得者與不卒然得者所主藥物大同小異是則
宜參究耳雖然論病則當嚴別所由論治卻宜實據
現在使風以陰陽不合化而病者必推前此五載十

年會患感冒以爲據是猶歷家之推歷元縱有合而無相干涉也但是見氣之壅滯則調其氣見血之澀則和其血見痰之涌逆則利其痰見溼之阻礙則行其溼風之由外入者鼓舞元氣以驅而散之風之由內成者提曳陰陽以和而息之縱是驟然而得積久而成能外是哉且前此諸篇有和血者矣有行溼者矣而未宣明其所以然得此賊風篇一證而後所以和血所以行溼乃能瞭如指掌則所謂喜怒不節飲食不適寒溫不時及志有所惡或有所慕檢前此諸篇亦未嘗不有互相脗合者總在臨時進退推移以求其合而無失之拘執無失之附會斯可矣

暴風瘙癢

蛇牀子平○主大風身癢煎湯浴之

藥性論

蒴藿温○主風癢癰瘡身癢溼痺

烏喙微温○主丈夫腎溼陰囊癢

蒺藜子温微寒○主身體風癢

景天平○主風癢惡癢

茺蔚子微温微寒○莖主癰瘡癢可作浴湯

青箱子温寒○主邪氣皮膚中熱風瘙身癢

楓香脂平○主癰瘡風癢

藜蘆寒微寒○主頭瘍疥癢惡瘡

蜀木烏蛇平○主諸風瘙癢疥皮膚不仁頑癩諸風



對案 葶藶子寒主暴風使○主暴中風熱痺癢

枳實微寒主大風在皮膚中癢君○主大風在皮膚

中如麻豆苦癢

殼莖主身癰癢煮水洗臣

類證 枳殼微寒○主風癢麻痺

仲景云太陽病得之八九日如瘧狀發熱惡寒熱多
寒少脈微面反有熱色者未欲解也以其不得小汗
出身必癢又云寸口脈遲而緩遲則為寒緩則為虛
營緩則為亡血衛緩則為中風邪氣中經則身癢而
癢癢又云脈浮而洪浮則為風洪則為氣風氣相搏
風強則為癰癢身體為癢癢則為泄風久為痲癩氣

強則爲水難以俯仰巢氏云游風在於皮膚逢寒則
身體疼痛遇熱則瘙癢又云人身皮膚虛爲風邪所
折則起癰瘰據是則風瘙癢證均係營衛有邪或寒
爲熱折熱爲寒折欲內不得欲出不能故耳夫心
營肺主衛熱折者病關於心營故血脈不咸而爲癩
寒折者病關於肺衛故氣機沸逆而爲水此篇中所
列除諸治下體溼癢外餘皆行心肺之物矣然行氣
者倍多利血者絕少則以諸痛癢瘡雖屬心火但癢
究在皮膚皮膚間氣旣行病氣已難駐趾任是血脈
間尙有邪氣涌出亦可隨氣而行竟使不能更聚惟
其瘙癢本涉於陰借陽分爲藏納者則宜從陽分透

達其陰滯以爲埽地無餘之計且病原係暴起則若是者本無多耳要之暴風瘙癢與賊風攣急均是暴病而一病於陽一病於陰病於陰故用搜逐之物多病於陽故用疏利之物多已屬兩相對待又相并而對待夫久風溼痺爲卒然而得積久乃成之規模治風者七篇其脈絡條理如此統會而觀之則非特久暫之分可明卽上下內外之別均瞭如指掌矣

傷寒

麻黃溫微溫○中風傷寒發表出汗去邪熱氣

葛根平○傷寒中風頭痛解肌發表出汗開腠理

杏仁溫○時行頭痛解肌心下惡

前胡微寒○傷寒寒熱推陳致新

芫胡平微寒○傷寒心下煩熱諸痰熱結實胸中邪

大青大寒○時氣頭痛大熱口瘡

龍膽寒大寒○時氣溫熱熱洩下利

芍藥平微寒○時行寒熱

薰草平○主傷寒頭痛上氣腰痛

升麻平微寒○時氣毒癘頭痛寒熱

牡丹寒微寒○時行頭痛客熱

虎掌溫微寒

朮溫

防己平溫○傷寒寒熱邪氣利大小便

石膏微寒大寒○時氣頭痛身熱

牡蠣平微寒○傷寒寒熱驚恚怒氣

貝母平微寒○傷寒煩熱淋瀝邪氣

鼈甲平

犀角寒微寒○傷寒溫疫頭痛寒熱諸毒氣

羚羊角寒微寒○傷寒時氣寒熱熱在皮膚溫風注毒

毒在骨間

葱白平○傷寒頭痛

豉寒○傷寒頭痛寒熱煩躁滿悶

人溺寒○寒熱頭疼溫氣

芒消大寒○主時疾壅熱藥性論



南京中醫藥大學圖書館版權所有

生薑微溫○傷寒頭痛鼻塞

藥對 栝樓寒主煩熱渴發黃臣○莖葉療中熱傷暑

葱根寒主頭痛發表臣

大黃大寒使○溫瘴熱疾利大小便

日華

雄黃平君

白鮮皮寒主時氣出汗臣○主時行腹中大熱飲水

大呼欲走

射干微溫治時氣病鼻塞喉痹陰毒使

茵陳蒿平微寒主發黃臣○通關節去熱滯傷寒用

之拾遺

梔子大寒臣○主時疾除熱及消渴口乾目赤腫痛

藥性論

青竹節微寒主頭痛臣○温氣寒熱吐血崩中筋痛
寒水石大寒主五内大熱臣○主時氣熱盛五藏

熱胃中熱煩滿止渴

水牛角平主温病使○療時氣寒熱頭痛

紫草寒主骨肉中痛臣

藁耳微寒臣○主中風傷寒頭痛

孟詵

虎骨平主傷寒○療傷寒溼氣

知母寒○療傷寒久瘧煩熱脅下邪氣

半夏微寒○主傷寒寒熱心下堅

仲景纂傷寒論用藥幾至百品今且未得其半果足

證類



盡傷寒之治耶殆有說焉傷寒論是曲罔其流而此則疏瀹其源也詳傷寒論兼證有風溼痹有風眩有水氣有下利有大便難有小便不利有黃疸有欬逆有痰飲有宿食有腹脹滿有腹中鳴有心下急結有心煩有喉痛有吐血有衄血有耳聾有目赤有瘀血有好眠有不得眠一一推明其傳變之由處以確當之治茲則已各分門類可別尋而得矣惟溯其得之之病曰傷寒曰時行曰中風曰溫疫曰寒熱曰溫瘴曰溫病曰傷暑以別其受病之故而推其始得病時所隸之證曰頭痛曰心下惡曰胸中邪逆曰大熱口瘡曰熱洩下利曰驚恚怒氣曰淋瀝邪氣曰諸毒氣

曰筋溢曰骨中痛以審定其緣何而連引及是以可
其治則而利導其陰陽馴擾其偏駁使不至傳變無
方與傷寒論實互相爲用而適相成者也夫以寒遏
陽而陽暴張以熱劫陰而陰驟耗當其正氣未動固
不難發越其寒以安陽解散其熱以存陰也無如其
來也非一途其宅也非一處何況勾引之者藏匿之
者皆人身平昔失職之氣血乃相與合從連衡根株
蔓引苟不分崑岡玉石直謂將而必誅則既患病之
人其無愆之陰陽有幾能不決裂潰敗哉故據其源
令轉相化誘而使滯者開鬱者解外者徹內者通就
其素相入而入因其故相和而和於是不相浹者浹



不相容者容以致乎陽能納陰陰能附陽而復其太和焉試覈篇中陳藥凡四十一味其未經傷寒論用者得二十一味參二十一味之性情功用皆在溫暑瘴疫痰溼毒火中與傷寒之源迥別其傷寒論常用而篇中闕如者除諸兼證可別尋主治外皆係溫補填攝之物則亦可悟源異者不可混施以求合流同者不必引繩以致歧六淫之外加二氣之內戾總在直據當時無泥陳迹則揚挖疏瀹各盡其長耳謂此篇補傷寒論之闕也可謂此篇闡傷寒論之義也亦無不可

大熱

凝水石寒大寒○腹中積聚邪氣皮中如火燒

石膏微寒大寒○口乾舌焦不能息

滑石寒大寒○身熱洩澀

黃芩平大寒○諸熱

知母寒○消渴熱中

白鮮皮寒○時行腹中大熱飲水

元蔞微寒○狂邪忽忽不知人

大黃寒大寒○腸間結熱心腹脹滿

沙蔞微寒○皮間邪熱

苦蔞寒○除伏熱

茵陳蒿平微寒○除頭熱

鼠李根皮微寒

竹瀝大寒

梔子寒大寒○胸心大小腸大熱心中煩悶胃中執氣

蛇莓大寒

人糞汁寒

白頸蚯蚓寒大寒○傷寒伏熱狂謬大腹黃疸

芒消大寒○五藏積聚久熱胃閉

藥對梓白皮寒除熱使○煎湯洗小兒壯熱一切瘡疥皮膚瘙癢

皮膚瘙癢

地膚子寒主五內熱利小腹君○主皮膚中熱氣

小麥微寒主胃中熱使○除熱止躁渴咽乾



木蘭皮寒主身大熱暴熱面皯臣○主身大熱在皮
膚中去面熱赤皯

水中萍寒主暴熱身癢臣○主暴熱身癢下水氣
理石寒君○除榮衛中大熱結熱解煩毒

石膽寒主肝藏中熱臣

牛黃平主小兒熱癩口不開君○主驚癩寒熱熱盛
狂瘥

羚羊角微寒主熱在肌膚臣

垣衣大寒主發瘡○主暴熱在腸胃

白薇大寒臣○主暴中風身熱肢滿忽忽不知人

景天平主身熱小兒發熱驚氣君○主大熱火瘡身

熱煩邪惡氣

升麻微寒主熱毒君○除心肺風毒熱壅藥性論

龍齒角平主小兒身熱臣○角主驚癇瘧瘕身熱

火

葶藶寒主身暴熱利小便使○主身暴中風熱癩癢

利少腹

藍葉實寒主五心煩悶君○主天行熱狂日華

蜣螂寒主狂語頭發熱使○主小兒驚癇瘧瘕腹脹

寒熱大人癲疾狂易手足端寒

棟實寒作湯浴通身熱主温病使○主温疾傷寒大

熱煩狂



荆瀝大寒主胸中痰熱臣○去心中煩熱小兒心熱

驚癩

拾遺

大熱卽傷寒論所謂身熱不惡寒反惡熱者也果爾則應隸之傷寒不得別爲條目且陽明病雖身熱不惡寒反惡熱其始得之一二日必惡寒也然則諸病皆有熱惟此病之熱獨盛他病不足與侔者方可謂大熱歟果爾則仍應諸病爲綱而熱乃其中一證今觀篇中所主均係熱盛而他病生非他病居先而熱續增也故夫大熱者雖有所在之不同所本之或異然終不惡寒無休息縱兼他病然推其故總由此而累及乃得獨標一目自成一證耳觀夫內有所因而

熱獨著於外外有所因而熱獨逼於內上有所因而
熱獨伏於下下有所因而熱獨浮於上雖同爲熱而
已各殊其分矣何況內者有在腸在藏在胃在肝在
心肺在胸中之異外者有在肌膚有在皮間有身瘡
有發瘡有肢滿之異上者有頭熱有口乾舌焦之異
下者有伏熱有洩澀有大腹黃疸有小便不利之異
若不因其輕而揚因其重而減有形者導之於內有
邪者瀆形爲汗而但執寒因熱用爲治可乎雖然大
熱者火盛也火盛必濟之以水乃篇中病因有緣溼
而熱盛者治法有利水而熱除者豈溼與水非但不
足以息火之怒而反足以資火之燃耶夫水火之相

濟也必其相和而後能相受不和則兩相拒而不相
下不受則兩相賊而適相殘故病本不盛以相拒
增以相賊而劇惟導去其相拒相賊者而病於以
焉非反也所謂適事爲故耳然則均之溼熱也水自
行而火自盛如身熱洩澀者此又何說哉夫身熱洩
澀者垢汗因熱而積於中也垢汗因熱而積於中則
澀者非特可滌垢亦且可洩熱乃垢不去熱又不減
則其故不在流行之水火而在留著之形質陽無所
入而轉盛陰無所交而自行故其治必使形質能隨
氣化而後氣化得行焉又不可與尋常溼熱並論也
寒者熱之熱者寒之固經訓也第以謂如火之燻水

水之沃火則非矣何以言之夫人身之陰陽相須以爲生相違而致病設病乎水者以火熯之水未竭則離火而水仍病水已竭則死矣病乎火者以水沃火未熄則水乾而火仍燃火已熄則亦死矣故治之道貴乎能使陰陽相入而相濟以成和相入之道無他在乎能巽順耳故易大傳曰巽入也試覈此篇之旨或全陰以配陽或化陰以從陽或浥水以滋火或迎火以致水陰格陽而陽怒者挾其陰而陽自暢陽蝕陰而陰消者裕其陰而陽自飫甚且引其至故所經行之道而陽通導其至故所舒散之化而陽泰而無一味逆折之意於其間對待而觀之則以熱治

寒之道可知矣推而廣之則宜補而用填塞之方宜泄而行罄盡之計救涸轍之鮒而扶西江之水療七年之病而求三年之艾均可謂不識時宜鹵莽滅裂者矣奈何從事於此者不思絲絲入籠耶或謂陰陽必相入而後得成和是固然矣第相入不徒恃巽順也如易大傳雖以巽爲入春秋傳之入猶可以順釋之歟是何不可之與有夫外之師而克入必其內有釁內之人旣出而復得入必其內有應今試以篇中實證附之外師之入虛證附之出者之入焉有無釁而可攻無應而得還者歟釁者民心之不順其上而固結焉者也應者民心之不忘於我而繫戀焉者也

因其不順而損之因其不忘而益之非巽順以入之
之謂歟說者謂堯舜是順民之心湯武是逆取順守
然易大傳不又曰湯武革命順天而應乎人是知成
和必以相入相入必以順也

勞復

鼠糞微寒○時行勞復

鼓寒

竹瀝大寒○胸中大熱煩悶

人糞汁寒○時行大熱狂走解諸毒

蜀本大黃大寒

葱白平

犀角寒

防己平

虎掌温

牡蠣微寒○除榮衛虛熱去來不定

生薑微温

芒消大寒○主時疾擁熱

證類
鼈甲平

芫胡平微寒

麥蘗冬平微寒

差後勞復元氣正傷病體增病自宜益劇則堵禦之
方補救之術應加廣矣奈何仲景弁髦視之寥寥數



本經戶部要卷一
三
則且并陰陽易差後勞復食復之治胥在焉可不謂
太簡乎殊不知傷寒正病外別六淫內析實虛推極
其變固已毫無罅漏但既係病愈復病則必有復病
著象故更隨象設法以示人就地剷除之義蓋六經
正文已要其終此則更原其始耳倘不應時獲驗而
更變幻披猖不仍有六經正文在乎是篇繼述仲景
之志剖析仲景之義尤妙在不卽不離間直謂全在
藕斷絲連草蛇灰綫處遺下陰陽偏勝隨所激動而
觸發焉故此數味之中汗下清和無非當時對證之
治而跬步不離病後復病之旨觀其於由痰由溼由
熱由蔽在氣在血總若因陳幹而發新枝者可不謂

脫胎仲景別樹新義者耶要之復病之流詎止於是
儻別現他證仍隨證索治可矣

溫瘧

常山寒微寒○溫瘧胸中痰結吐逆

蜀漆平微溫○瘧腹中堅癥痞結

牡蠣平微寒○溫瘧洒洒驚恚怒氣

鼈甲平○溫瘧血痕腰痛

麝香溫○溫瘧辟惡氣

麻黃溫微溫○溫瘧去邪熱氣

大青大寒

防葵寒○溫瘧驚邪狂走



豬苓平 ○ 痰瘧利水道

防己平 溫 ○ 溫瘧熱氣利大小便

茵芋溫 微溫 ○ 溫瘧發作有時 藥性論

巴豆溫 生溫 熟寒 ○ 溫瘧癥瘕結聚堅積留飲痰癖

白頭翁溫 ○ 溫瘧狂易寒熱

女青平 ○ 溫瘧辟不祥

芫花溫 微溫 ○ 鬼瘧

白薇平 大寒 ○ 溫瘧洒洒發作有時

松蘿平 ○ 痰熱溫瘧可為吐湯

蜀本 天靈蓋平

堯花寒 ○ 主傷寒溫瘧



茵陳蒿平○主瘡瘻日華

藥對龜甲平臣○療疥瘡

小麥微寒

躑躅温使○主温瘡

白斂微寒主温瘡寒熱使○主小兒驚癇温瘡

蒴藿根温使

當歸温主瘡寒熱君○主温瘡寒熱酒洒在皮膚中
竹葉平合常山煮主孩子久瘡極良雞子黃和常山
爲丸用竹葉湯下主久瘡

證類桃仁平

烏梅平○治瘡方多用之



雄黃平大溫

葛蒲溫○小兒溫瘧身積熱不可解可作浴湯

莽草溫

目標溫瘧舉瘧瘧瘧鬼瘧瘧寒熱而胥附焉何
夫瘧瘧瘧瘧鬼瘧瘧寒熱之混於溫瘧猶時行溫疫
瘧熱之混於傷寒矣古人別病極嚴凡相似而析者
不徒析也必其同中有異不相似而合者不徒合也
必其異中有同是故傷寒時行溫疫瘧熱之合以其
皆屬陰陽相拒溫瘧瘧瘧瘧瘧鬼瘧瘧寒熱之合以
其皆屬陰陽相爭耳夫陰陽相爭則分理其陰陽可
矣乃劫痰行水利溼之物且居其半何哉殊不知此



正分理陰陽微意所在也素問瘧論大旨邪藏骨髓之中不與陽俱出而隨陰偕行出則并於陽以與爭爲熱復入則并於陰以與陽爭爲寒者爲溫瘧加於陰陽逐陰行者謂之汗則溫瘧之邪固依水行止者也淒愴寒水藏於腠理復感於風雨氣相搏伏衛氣經行之所屆衛氣來先受者先動則風并於水而寒後感者後動則水并於風而熱者爲瘧寒熱必得汗而熱始解則瘧寒熱之邪亦依水爲行止者也特溫瘧之汗當其始瘧寒熱之汗當其終耳靈樞五癰津液別篇謂天暑衣厚爲汗天寒衣薄爲溺與氣則汗與小便本係一氣所化而翕張於外則有去

有來通輸於下則往而不反是治瘧者多半以劫痰
行水利溼又何疑焉觀篇中卽非劫痰行水利溼者
其旋轉陰陽每於闔翕張之處緩其陽之怒以撓
陰而於結聚痞滿之中洩其陰之阻以激陽其使
達者又每跬步設防俾能出不能復入以就其徹底
畢達之功其與他外感爲寒熱者界劃分明無少混
淆是其綱舉目張有條不紊爲何如哉若夫瘴瘧鬼
瘧卽瘧寒熱之偶兼他癘者瘵瘧卽瘧寒熱之久而
不已者皆陰陽相爭者之支流餘派如瘴瘧雖亦起
落有時卽不入焉則以其單熱無寒非陰陽相爭耳
故斥之

然則明人所創治瘧方謂使邪離於陰陽者非極善
之法歟夫其所謂用風藥之甘辛氣清者以升陽
使離於陰而寒已用苦甘寒引陰氣下降使離於
而熱已者是使陰陽相離非使邪與陰陽相離也使
邪與陰陽相離猶可言人身陰陽可使之相離乎且
瘧論明言瘧由暑熱氣藏於營氣之舍寒水氣舍於
皮膚之內而其所用甘辛氣清風藥芫胡升麻葛根
羌活防風果可使藏於營氣之舍者離乎其用苦
甘寒石膏知母甘草粳米果可使舍於皮膚之內者
離乎吾正恐其在外之陰邪愈加蔽痼在內之陽邪
益難升發兩氣互阻馴至寒不成寒熱不成熱決裂

潰敗耳烏得云極善之法哉嗟嗟土苴古法芻狗經
方非一日矣太陽病得之八九日如瘧狀發熱惡
熱多寒少一日二三度發身癢者與桂枝麻黃各半
湯服桂枝湯後形如瘧日再發者汗出必解宜桂枝
二麻黃一湯之文何嘗不在傷寒論何嘗不使邪氣
與陰陽相離芫胡去半夏加栝樓根湯治瘧病發渴
亦治勞瘧芫胡桂枝乾薑湯治瘧多寒微有熱或但
寒不熱之文何嘗不在金匱要略亦何嘗不使邪與
陰陽相離擴而充之則皮膚之內邪氣盛者大小芫
胡芫胡桂枝小芫胡加芒消加龍骨牡蠣亦何者不
可用乎每於瘧來時先嘔者用半夏瀉心吐瀉交作

者用生薑瀉心胸痞下利者用甘草瀉心汗多腹脹
滿者用厚朴生薑甘草半夏人蔘腹滿痛者用桂枝
加芍藥皆應如桴鼓若更參此篇以逗引其陰陽
摘其巢窟當益便利如指而必杜撰成方以示古法
經方之可唾棄耶且夫邪之陰陽與人身之陰陽不
能不相從猶水之必流溼火之必就燥不能強之使
違也况邪能與陰陽相并而爲旋轉之樞耶相并者
能相入也能相入原係人身陰陽生化之機故瘧雖
久多不致死特能相入而不能相和故每連月浹旬
不能驟解以其開者自爲開闔者自爲闔而不能相
顧耳倘使闔中有開能拒邪而不拒正開中有闔能

入正而不入邪斯開闔之間陰陽日相聯絡邪氣日
益零落愈病之機遂可把握故本篇之用介類實皆
取意於翕闢之中以挫其邪較之取意於使邪與
陽相離者明眼觀之自有以知其不侔矣

本經序疏要卷一



本經序疏要卷之二目錄

中惡十二

霍亂十三

轉筋十四

嘔哕十五

大腹水腫十六

腸澼下痢十七

大便不通十八

小便淋十九

小便利二十

溺血二十一





本經序疏要卷之二

武進鄒澍學

中惡

麝香温 ○中惡心腹暴痛脹急痞滿

雄黃平寒大温 ○中惡腹痛鬼疰

丹沙微寒 ○中惡腹痛毒氣

升麻平微寒 ○中惡腹痛

乾薑温大温 ○中惡霍亂脹滿

巴豆温生温熟寒

當歸温大温 ○中惡客氣虛冷

芍藥平微温 ○中惡腹痛腰痛



冥茱萸温大熱○中惡、心腹痛逆氣

鬼箭寒○中惡腹痛

桃梟微温○中惡腹痛殺精魅

桃皮平○中惡腹痛胃中熱

桃膠微温○中惡疰忤唐本

烏頭温大熱

烏雌雞血平○中惡腹痛

蜀海桐皮平○主霍亂中惡

肉豆蔻温○主中惡冷疰嘔沫冷氣

蓬莪茂温○主心腹痛中惡疰忤鬼氣

藥對 牛黃平君○主卒中惡



芎藭温臣○主中惡卒急腫痛

苦蕒寒臣○主中惡腹痛

藥性論

梔子大寒臣○主中惡通小便

藥性論

棠耳葉微寒臣

桔梗微温臣○主中惡

桃花平使○治惡氣

日華

巢氏云中惡者卒然心腹刺痛悶亂欲死也按此與賊風均為卒發之病第風係陰陽之偶愆故鍾於音聲發為飄驟由腠理入筋脈而阻人營衛此是陰陽之偏駁故鍾於臭味發為激射由口鼻入胸腹而隔人氣血耳其已中人也又或為嘔吐或為腸澀下利



南京中醫藥大學圖書館版權所有
1964

或爲腹脹或爲霍亂自當各按見證而求治惟或著於陰而錮陽或著於陽而逼陰或著於血而閉氣或著於氣而動血種種不同是以投其間抵其隙或崇陽以化陰或由陰以起陽或通氣以調血或和血以行氣大率用苦辛溫烈爲主治間之推蕩以開其蔽佐之升發以揚其遏率之辟惡以奪其魄雜之調和以緩其急因其欲上而上之因其欲下而下之因其欲外而外之因其欲行而行之盡矣第此與心腹冷痛大同不過彼係積漸而成此由卒暴而得以冷原天地之正氣惡是天地之沴氣正氣與正氣自能彼此相容不久可化乃痛而不已焉則其人正氣之不

足尤盛故治之者多以補而溫。溫者氣與正氣本不能相入故隨卽激而發病而治之者必相度其勢而疏瀹利導之也。奈何世之診視二者不目爲急痧卽謂爲肝氣急痧則用金石開洩之劑猶可開通閉塞。去穢氣肝氣則用飭斂利氣之物不能去病適以導病游行他所治病貴乎先正病名厥有旨哉。

霍亂

人藪微寒微溫○霍亂吐逆調中

尤溫○霍亂吐下不止

附子溫大熱○心腹冷痛霍亂轉筋

桂心大熱○霍亂轉筋

乾薑温大熱○霍亂脹滿

橘皮温○氣衝胸中吐逆霍亂止洩

厚朴温大温○霍亂腹痛脹滿

香薷微温○霍亂腹痛吐下

麝舌微温○主霍亂腹痛吐逆心煩

高良薑大温○胃中冷逆霍亂腹痛

木瓜温○霍亂大吐下轉筋不止

蜀本小蒜温○歸脾腎主霍亂腹中不安

雞屎白微寒

菹豆葉○主霍亂吐下不止

雞舌香微温○療霍亂心痛



豆蔻温○山薑去惡氣温中中惡霍亂心腹冷痛功
用如薑

楠材微温○主霍亂吐下不止

蓬莪茂温○主霍亂冷氣吐酸水

肉豆蔻温○主霍亂中惡冷疰嘔沫冷氣

海桐皮平○主霍亂中惡

吳茱萸大熱臣○主霍亂瀉利

日華

藥對證類

丁香○温脾胃止霍亂擁脹

既云嘔吐而利名霍亂矣復云病發熱頭痛身疼惡
寒吐利者名霍亂是霍亂之證不特吐利必且兼有
表證矣又云利止復更發熱又云卻四五日至陰經

本經序流要卷二 霍亂



上轉入陰必利又云似欲大便而反失氣仍不利者屬陽明見霍亂之證吐利止後有表證不止者且有實則入陽明虛則入三陰者矣傷寒論霍亂篇寥寥數策而外自三陽內至三陰貫通周浹傳變分明治法詳盡如此何容復贅一辭乃茲篇更以藥二十餘味命爲通治霍亂而仲景所不用者十居其八是果於仲景之書有關會否耶蓋嘔吐暨下利有因傷寒而致者有不因傷寒而致者則霍亂亦必如是矣霍亂之有因傷寒而致有不因傷寒而致於何別哉巢氏曰霍亂者揮霍之間便致繚亂也由人溫涼不調陰陽清濁相干亂於腸胃變發則心腹絞痛心痛者

先吐腹痛者先利心腹竝痛則吐利俱發實者身發
熱頭痛體痛虛者但吐利而已其別有飲酒食肉腥
膾生冷過度者有居處不節者有露卧溼地者有當
風取涼風冷襲之者皆歸於三焦傳於腸胃而作也
惟此則不特霍亂之或因傷寒或不因傷寒既可曉
然卽此篇藥品所主亦將思過半矣蓋補虛有調中
和中之物去實有利氣疏氣之物驅溼有散發滲利
之物達外有開拓經絡之物以及解酒辟腥卻寒除
水槩欲腸胃間陰陽相順而不相干使廩於三焦輸
於膀胱是不特竟霍亂之委抑且徹霍亂之源矣於
仲景書又何悖焉

轉筋

小蒜温

木瓜温

橘皮温

雞舌香温

楠材微温 ○轉筋日華

豆蔻温

香薷微温 ○轉筋可煮汁頓服半升孟詵

杉木微温

菹豆微温

薑微温 掌氏曰本經朱字乾薑温墨字生薑微温若從朱字則是乾薑即不當言微温若從微温則是



生薑卽當作墨字然二薑俱不主轉筋難以改正

霍亂有因傷寒而致有不因傷寒而致固然矣轉筋有因霍亂而致有不因霍亂而致亦不易之理也奈何此篇所陳藥品檢覈本經別錄多無主轉筋明文率有主霍亂名目則一似轉筋竝由霍亂來者可乎蓋巢氏之言可徵矣云大吐下後陰陽俱虛血氣皆極則手足逆冷而營衛不理冷搏於筋筋遂爲之轉云足太陽下血氣皆少則喜轉筋喜踵下痛以血氣少則易虛虛而風冷乘之故也是以時俗之發轉筋止有兩端一者由霍亂一者老人夜卧足間不煖而二者之來一係吐下後一係無病又一則足筋轉手

筋亦轉一則及足不及手皎然可辨也惟篇中所列
祇及霍亂轉筋而不及老人轉筋此則應有說焉夫
曰冷搏之冷乘之是冷氣能及筋筋畏冷氣爲之絞
轉非冷能入之也而皆云因血氣之少營衛之虛則
護衛失於外蔥餒存乎中其情益著矣然其虛也有
方病方不病之殊方病者摘去其病源病已而轉筋
不能不已方不病者亦必求其所以虛之由自當覈
諸虛勞腰痛等篇若以虛勞腰痛等篇煖下補益之
物混於此中則似霍亂轉筋亦有溫補之治以霍亂
者必轉筋老人者不皆轉筋故其治自宜畧畫分明
耳霍亂篇尙兼用補益惟此篇則消暑祛溼溫中利

氣獨不及補益可見霍亂固有因虛而作者第因虛而作者多不必轉筋則此篇雖寥寥數味又豈不足取證於別錄本經豈竟遂無間隙可尋義旨可按耶

嘔哕

厚朴溫大溫○胃中冷逆胸中嘔不止

香薷微溫

麝舌微溫

雞舌香微溫

附子溫大熱

小蒜溫

楠材微溫

高良薑大温○暴冷胃中冷逆

木瓜温

桂大熱○欬逆結氣擁痹

橘皮温○胸中瘕熱逆氣冲胸中吐逆

蜀本枇杷葉平○卒哕不止下氣

麝香温

肉豆蔻温○中惡冷疰嘔沫冷氣

藥對青竹筍微寒主哕嘔臣

蘆根寒生主哕○開胃除噎噦不止
藥性論

通艸平主哕臣○心煩噦出音聲

生蓼萸根汁寒



證類
人淺微寒微温○胸脅逆滿

丁香温

朮温

說文玉篇廣韻皆無哕字哕字始於難經第十六難
曰其病煩心心痛掌中熱而哕有是者心也滑氏注
云哕乾嘔也夫哕之義爲乾嘔而此篇之目曰嘔哕
若合爲一貫則嘔哕連稱於義不可通若分作兩層
剖嘔與乾嘔爲二項則嘔又與下文嘔吐條犯複矣
諸病源候論嘔之目有六曰乾嘔曰嘔噦曰噦曰嘔
吐曰噦酢曰惡心是乾嘔不能與嘔同稱之證其諸
爲嘔噦之譌歟廣韻噦字讀呼會切者其義爲鳥聲

於此無涉讀於月切者其義爲逆氣而凡宛傍之號
苑字讀於月紆物於歇等切則宛噦以聲相近而爲
省體稔矣况本篇通草下藥對云主宛而別錄則謂
心煩噦出音聲非確不可移之證耶嘔噦云何巢氏
曰胃受邪氣則嘔脾受邪氣則脹而氣逆遇冷折之
氣不通則噦靈樞口問篇曰穀入於胃胃氣上注於
肺今有故寒氣與新穀氣俱還入胃新故相亂真邪
相攻氣并相逆復出於胃故爲噦是嘔者氣上逆而
有物噦者氣上逆而有聲或先有聲而繼之以物或
旣有物而復續之以聲者命曰嘔噦何爲不可乎以
是知嘔噦有因氣者有因寒者有因火者有因水者

有因虛者導氣更橫開直降散洩通順之不同逐寒
又溫中煖下開結通陽之各異至於益津調中以退
火開解滲利以驅水益氣洩溼以補虛篇中莫不隨
事而制宜因利而乘便要之皆直揭其原而濬其流
斯無盛盛虛虛之弊耳傷寒論云傷寒大吐大下之
極虛復極汗出者以其人外氣怫鬱復與之水以發
其汗因得噦所以然者胃中寒冷故也云傷寒噦而
腹滿視其前後知何部不利利之則愈金匱要畧云
病人胸中似喘不喘似嘔不嘔似噦不噦徹心中憤
憤然無奈者生薑半夏湯主之云乾嘔噦若手足厥
者橘皮湯主之噦逆者橘皮竹筴湯主之夫以水火

相軋而病以陰開陽入而愈其常也而不知縷析條分源同派異有如本篇者又焉得不揣切本篇義旨而爲仲景擴充微蘊耶

大腹水腫

大戟寒大寒○十二水腹滿急痛

甘遂寒大寒○大腹疝瘕腹滿面目浮腫

澤漆微寒○皮膚熱大腹水氣四支面目浮腫

葶藶寒大寒○邪水上出面目浮腫下膀胱水

芫花溫微溫○消胸中痰水喜唾

巴豆溫生溫熟寒○留飲痰癖大腹水脹

豬苓平

防已平温○水腫風腫

澤蘭微温○大腹水腫身面四支浮腫骨節中水

桑根白皮寒○水腫腹滿臏脹利水道

商陸平○水腫痿痹腹滿洪直疏五臟散水氣

澤蔞寒○逐膀胱三焦停水

郁李仁平○大腹水腫面目四支浮腫利小便水道

海藻寒○腹中上下鳴十二水氣

昆布寒○十二水腫

苦瓠寒○大水面目四支浮腫下水令人吐

小豆平○下水利小便

瓜蒂寒○大水身面四支浮腫下水



蠶魚寒 ○溼痺面目浮腫下大水

鯉魚寒 ○水腫腳滿下氣

大豆平 ○逐水脹除胃中熱痺

蕤花寒微寒 ○下十二水利水道

黃牛溺寒 ○水腫腹脹腳滿利小便

蜀本海松子小温 ○散水氣

藥對香薷微温主水腫臣 ○散水腫

穀米微寒主逐水腫利小便臣

通草平主利水腫及小便臣

麥門冬微寒臣 ○身重目黃心下支滿

椒目寒主除風水滿使



柳花寒主腹腫使○風水黃疸面熱黑

雄黃平君

白朮溫逐尿水結腫君

秦艽微溫主下大水臣

水腫一證支派甚多在素問有腎風風水湧水之別
在靈樞有膚脹鼓脹腸覃石瘕石水之別在金匱要
畧有風水皮水正水石水氣水血分氣分之別在諸
病源候論有水分毛水疸水燥水溼水水癥水瘕水
蠱水澼之別今以藥三十三物概之謂可挈其要領
而盡其變歟是固不可然其命意所在亦實有甚廣
大而極精微者不可不察也蓋水者節制於肺輸引



南京中醫藥大學圖書館版權所有

於脾敷布於腎通調於三焦膀胱此其分焉者也一

處有病則諸處以漸窒礙乃遂成水此其合焉者也

自其分者而言則或始於喘呼或始於脛腫或廓於

皮膚或充於腸胃或綳急於外而中空或堅結於裏

而中實自其合者而言則均之一身支體面目洪腫

已矣就其合邈其分而別其勢之靜與動虛與實驗

其機之上與下出與入焉以迎而奪之適事為故非

已得其要領遂貫其條目也耶或謂湯液酒醴論所

謂開鬼門潔淨府者是治水之大綱詳篇中所列藥

品大都皆屬潔淨府而於開鬼門僅畧及焉不可謂

偏而不全乎夫論治論藥自是二端無容相混就如



金匱要畧水氣篇何嘗不麻黃桂枝細辛生薑間用
其黃芪附子甘草石膏芍藥杏仁枳實用之亦不
而足又如千金方外臺秘要等以兼喉中鳴而加
前半夏兼欬上氣而加五味乾薑兼小便癢閉而加
石韋兼癥瘕及澀而加麝香牽牛藜蘆苦葶狼毒烏
頭野葛雄黃兼滿而加厚朴兼結而加射干兼熱而
加黃芩大黃用適其當未嘗不奏捷也而目之謂主
水腫可乎蓋治必以方方必該一病之全藥須求主
主必抵一病之隙歷繹自唐已前方書罔有治水而
不用此篇之藥者矣未有他證不兼有水而用此篇
之藥者也則彼此交互之處豈無意義寓於其間乎

水證必小便不利茯苓爲利小便統領本經載之仲
景遵用之別錄且一謂其主大腹淋瀝二謂其主水
腫淋結此獨屏不載入豈無故哉夫松當生長之際
其氣上行則質疏而葉散色青而不彫及斬伐之餘
其氣下淪則疏變爲堅散變爲整故若松脂之主疽
瘡松實之主風痹松葉之主風溼松節之主久風皆
病淫於軀體而不能散者至茯苓之利水則病結於
中而不能下者觀其上行之氣於色爲青下行之氣
於色則白青主升而白主降其能利水審矣第茯苓
之利水固降水之結於中而不下者若水而過顛在
山汪洋盈溢則非其所能降也篇中諸味所主之證

不曰面目四支浮腫則曰腹滿臚脹急痛盡向上胸
橫之水是豈茯苓所能利故別錄所列不合之曰夫
腹水腫而分之曰大腹淋瀝水腫淋結夫淋者小便
澇也結則閉而難通瀝則通而不爽大腹則氣盛於
水水腫則水盛於氣曰大腹淋瀝見氣不能化水曰
水腫淋結見水不從氣化茯苓者專行直道令水道
氣通使水隨氣化而下是固的對相符之劑矣而本
篇不載非漏也亦非佚也見其所主者淋而非主大
腹水腫也若載之豈不嫌於能主上出橫出之水平
是故大腹水腫而淋瀝淋結用之可也不淋瀝淋結
用之無益也此其不載之故歟

然則澤蔦猪苓非茯苓儔歟且其經文絕不及大腹
水腫乃得竝列篇中何也夫水不畏其難於決泄而
畏其旁溢上出不患其不從陽宣而患其不從陰化
故凡水病仲景收列之方後人獲效之法用溫用補
者何限此篇槩不及焉非匿也蓋以日暴水以火熯
水原夫人知之無煩更諳諳耳良以水體陽而用陰
性動而好靜試觀天下巨川凡歸壑處必先滙爲大
浸復束而狹之則其奔流就下自無阻滯不畏其更
淤濁而淀矣猪苓所治之水平流漶漫不攪亦濁澄
亦不清者也而欲其從陰化是猶使滙爲澤乃加束
縛焉以助其湍疾耳是本經利水道之謂也凡水中

有熱則趨下必梗以熱欲上而水欲下也其在人而應之以濁并可見其非特熱不得伸水亦不得升矣惟澤蔞善使水中之氣出於水上氣伸而水亦升水中之精微升則其體質降矣故本經稱之曰消水別錄稱之曰主消渴而更謂爲逐膀胱三焦停水也夫膀胱屬太陽三焦屬少陽少陽爲樞太陽爲開惟陽盛而不開緣樞折而不轉則其所蓄非熱其誰水以熱停而欲逐之自宜先轉其樞樞轉而升降自遂矣要而論之澤蔞所主是水中之氣不化故於大腹水腫爲要劑豬苓茯苓所主是水不從氣化故應次之而茯苓是水蓄於陰不從陽化豬苓是水漫於陽不

本經序疏要 卷二
從陰化以兩者相較則不從陽化者其常不從陰化者其變以是常者可畧變者不應畧耳

腸澼下利

赤石脂○腹痛洩澼下利赤白

龍骨平微寒○泄利膿血

牡蠣平微寒○澀大小腸止大小便

乾薑温大熱○腸澼下利

黃連寒微寒○腸澼腹痛下利

黃芩平大寒○腸澼洩利逐水

當歸温大温○止利腹疼

藥性論

附子温大熱○下利赤白

禹餘糧寒○煩滿下赤白小腹痛結煩疼

藜蘆寒微寒○洩利腸澼

檉木寒○止洩利

雲實温○洩利腸澼

礬石寒○寒熱洩利白沃

阿膠平微寒○療風止洩

熟艾微温○止赤白利

陟釐大温○温中消穀强胃氣止洩利

石硫黃温大熱

蠟微温○下利膿血

白蠟○久洩澼後重見白膿



烏梅平○除冷熱利

石榴皮平○療下利

枳實寒微寒○止利

蜀本使君子温○療溼利

金櫻子平温○療脾洩下利

藥對白石脂平主水利臣○止腹痛下水小腸溼熱澹便

膿血

牛角鯁温治利臣○止冷利瀉血

藥性論

滑石寒主澀下君○身熱洩澀

地榆微寒止血利

桂心大熱主下利君



吳茱萸大熱主冷下洩臣

鯽魚頭溫主下利○作鱠主久赤白利

厚朴溫主下洩腹痛臣○洩利

白朮溫主胃虛冷利君

蜜平主赤白利君○止腸澼

龜甲平主下洩臣○漏下赤白

久蜺殼寒主下利使

薤白主下赤白利臣

白頭翁溫主毒利止痛使

猬皮平主赤白利臣○腸風瀉血

蝮蛇膽寒主下蠱蟲使

柏葉微温主血利君

蒲黃平主下血臣

小豆花平主下利使

麴温主腹脹冷積下利臣○消穀止利

豬懸蹄微寒主下漏洩使

雞子平主下利○卵白主小兒下洩

貝子平主下血

白蘘荷微温主赤白利臣

葛穀平主十年赤白利臣

赤羊脂温主下血臣○合腎爲羹療勞利

唐本

菴蓉微温主赤白下利臣○除膀胱邪氣腰痛止利

赤白花鼠尾草微寒主赤白下利使○下利膿血不

止白花者主白赤花者主赤

類證 赤地利平○赤白冷熱諸利

桃花石温○大腸中冷膿血利

腸澼下利顯不同科釋名云洩利言其出漏洩而利

也下重而赤白曰膈言厲膈而難也是一病於通一

病夫塞烏得以一物兩縮之耶殊不知塞與通皆由

於結陰結而陽不足以破之是以病乎逼陽結而陰

不足以入之是以病乎塞故治利治澼不容苟同解

結闕途仍歸一轍此篇中用温劑燠寒滯泄劑逐水

停所以既堪挽其過通即得開其蔽塞也而其批卻

大經平流要 卷二 腸澼下利



導窾卻又別有經緯蓋讀傷寒論金匱要畧而知其
部署分析各有區域焉曰久利曰暴利而已矣治久
利者烏梅丸是也暴利者復宜分上中下三停所謂
傷寒服湯藥下利不止心下痞硬服瀉心湯已復以
他藥下之利不止醫以理中與之利益甚理中者理
中焦此利在下焦赤石脂禹餘糧湯主之復利不止
者當利其小便是也合四方一法而本篇原所載藥
已十得八九矣再覈之以熱利氣利清穀利厥逆利
既吐且利實結利此中豈復更有餘蘊哉惟一篇之
中別有所因一證之內更有罅隙故不得不窮其流
而指以歸束如病在血者及開闔之不遂者食物之

不化者徑道之枯澹者自當各有的對之治焉其他
兼外邪者解其表而利自甯因勞乏者補其虛而漏
自止則又不待言而可識矣

水利久水利赤利久赤利血利久血利赤白利久赤
白利疝利久疝利此外臺秘要方條目也熱利冷利
疝溼利此千金方條目也太陽病桂枝證醫反下之
利遂不止太陽中風下利嘔逆太陽與陽明合病必
自下利太陽與少陽合病下利傷寒發熱汗出不解
心中痞硬嘔吐下利陽明少陽合病必下利太陰爲
病腹滿而吐食不下自利益甚時腹自痛自利不渴
者屬太陰少陰病脈微下利少陰病下利清穀裏寒

人經...
卷二
腸瀉下利



外熱厥陰病下之利不止傷寒先厥後發熱而利者
必自止見厥復利傷寒始發熱六日厥反九日而利
後三日脈之其熱續在者期之且日夜半愈此傷寒
論條目也統而繹之一言新久一言冷熱一言表裏
其何以合之是篇而使有所適從乎夫是篇者所以
盡其常三書者所以極其變無是篇諸藥不足定下
利之指歸無三書推原不足知下利之委曲此三書
與是篇互相發明還相成就處也至三書旨趣似若
猶有歧者然千金不云乎利方萬千撮效七八宏之
在人陟釐丸烏梅丸松皮散暴利服之何有不差溫
脾湯建脾丸久利得之焉能不愈而陟釐等法載在

熱利溫脾等方隸諸冷利是已可就新久而分冷熱
矣况在傷寒金匱玄機妙諦如走盤珠毫無窒礙如
植芎藭逐節生根而其歸著仍有大綱挺然對峙則
曰自利因下而利也自利者不乘裏不虛因下而利
者不連表難治何以故曰下利脈沉弦者下重也脈
大者爲未止脈微弱數者爲欲自止雖發熱不死曰
下利有微熱而渴脈弱者令自愈曰下利脈數有微
熱汗出令自愈設復緊爲未解此自利乘裏可治之
候也曰下利手足厥冷無脈灸之不還反微喘者死
曰少陰病惡寒身踈而利手足逆冷者不治此自利
乘裏不可治之候也曰太陽病下之後其氣上沖者



可與桂枝湯如前法曰太陽病下之仍頭項強痛翁
翁發熱無汗心下滿微痛小便不利桂枝去桂加茯苓
苓白朮湯主之此雖下而連表之候也曰動氣在
不可下下之則腹脹滿卒起頭眩食則下清穀心
痞曰咽中閉塞不可下下之則上輕下重水漿不下
卧則欲蹠身急痛下利日數十行此因下而不連表
之候也雖然利之支流庸詎止是如膿血利水飲利
寒熱錯雜利熱利協熱利甚者有應下之利且不一
端焉何也蓋病之情不一病之變不一病之遷延不
一病之駐足不一若因乎熱因乎實而止者不行行
者不止以至水不資火火不運水則捨下何以使熱

去而水得滉土水既滉土而火遂暢朗耶夫然故證多矣多不云急下而惟下利之當下者每稱急下此可憬然悟也若夫以寒已熱以錯雜對待錯雜其理皆甚易明以驅飲除水俾水去而利自止者更不煩言矣

更有一言可明全局者曰千金方之以利屬脾藏也夫脾不爲土乎利者水土之不膠黏也素問經脈別論食氣入胃散精於肝淫氣於筋食氣入胃濁氣歸心淫精於脈脈氣流經經氣歸於肺肺朝百脈輸精於皮毛毛脈合精淫氣於府府精神明留於四藏氣歸於權衡權衡以平氣口成寸以決死生流轉藏氣

徧沾所合而不及脾腎是可證食入於陰氣長於陽
矣飲入於胃游溢精氣上輸於脾脾氣散精上歸於
肺通調水道下輸膀胱水精四布五經竝行合於
時五藏陰陽揆度以爲常則獨重脾腎夾輔以肺與
三焦三焦肺通膀胱之道也而徧行陽道以澤陰是可明飲入

於陽氣長於陰矣故小戴禮郊特牲曰凡食養陰氣
也飲養陽氣也不可互相發明耶土之於水也能溼
而後布水之於土也就範而後流猶江河必行於地
設使地不足以隄水爲害者固水也受害者其誰耶
土卑靡則水爲窪積而至盈必潰捨培土何以使之
相和土剛礲則水不沾洩而無留必燥捨壅土何以

使之相入大寒凝沍凌結於上土燥於下捨溫煦無
從就和大暑溽潤土既饜飶水遂漫溢捨涼肅決難
消落此篇中用寒用溫厚土疏土所以竝行不悖
若土之高下驟殊水之奔駛莫挽宜於置閘以蓄
水之衝激所向土之抵禦難周宜於加隄以護之此
篇中用濇用固之旨更若土平水漫待涸無期何能
不鑿渠以導水低土燥盼澤維艱何能不仰厚爲資
此篇中用疏洩用滋柔之方也他如緣蟲聚而水礙
流因食滯而水被阻血濇亦能致氣濇氣濇遂足離
水土之交氣漓亦能致血漓血漓儘足解鍵鑄而潰
烏能不一一涉及脾腎哉



大便不通

大黃寒大寒○蕩滌腸胃推陳致新通利水穀

巴豆溫生溫熟寒○蕩練五藏六府開通閉塞利水

道

石蜜平微溫

麻子平○初食利大小腸久食則否陳士良

牛膽大寒○利大小腸藥性論

猪膽微寒

證類朴消寒大寒○逐六府積聚結固留癖

芒消大寒○五藏積聚久熱胃閉

大戟寒大寒○利大小腸



檳榔温○逐水除痰癖

牽牛子寒○治疔癖氣塊利大小便

藥性論

郁李仁平○治腸中結氣關格不通

藥性論

以大便不通而用篇中諸味皆可無藉思索立得成
驗者豈遂徑情直行竟投之乎抑猶當瞻顧詳審乃
用之也予則謂下藥終不可浪投觀仲景諳諳於不
可下至反覆煩碎而所謂當下之急下之者脫口而
出又若斷不容遲則其故必有在矣夫當下之證莫
多於陽明篇以陽明之病爲胃家實正大便不通之
謂也然猶汗出多者不可下小便多者不可下不能
食者不可下脈緩弱者不可下何況咽中閉塞者不

可下諸外實者不可下
脈浮大者不可下
病欲吐者不可下
諸四逆厥者不可下
面合赤色者不可下
下硬滿者不可下
又疊載於不可下篇耶
雖然既識其不可用
卽不失其所當用
故夫大便不通而無
以上諸證
旁見側出者
遂徑情直行而用之
何患焉
以是觀之
則篇中所載
已覺其謹嚴不苟
甚矣夫推
寒蕩熱兩物之雄
爽峻健
旣已竝峙於前
餘非潤以滑之
則血肉之品
苦以洩之而已
下藥何限
豈獨此區區哉
卽唐氏所續
軟堅逐水導氣
開結又豈無功
相似性相近者
可以羅列備採
耶太陽病寸緩
關浮尺弱其人
發熱汗出不惡
寒而渴者
此轉屬陽明也

小便數者大便必硬不更衣十日無所苦也渴欲得
水少少與之但以法救之渴者宜五苓散傷寒
日頭汗出微惡寒手足冷心下滿口不欲食大便
脈細者此爲陽微結必有表復有裏也可與小茈胡
湯陽明病本自汗出醫更重發汗病已差尙微煩不
了了者此大便必硬故也以亡津液胃中乾燥故令
大便硬當問其小便日幾行若本小便日三四行今
日再行故知大便不久出今爲小便數少以津液當
還入胃中故知不久必大便也仲景於大便不通不
下之下不治之治如此後人尋思於此而擴充之卽
此篇治法亦自有在矣

小便淋

滑石寒大寒○通九竅六府津液去留結止渴

冬葵子及根寒○主五癰利小便

白茅根寒○利小便下五淋

瞿麥寒○關格諸癰結小便不通

榆皮平○大小便不通利水道

石韋平○五癰閉不通利小便水道

葶藶寒大寒○下膀胱水伏留熱氣

蒲黃平○心腹膀胱熱利小便

麻子平○逐水利小便

琥珀平○通五淋



石蠶寒○主五癰破石淋解結氣利水道除熱

蜥蜴寒○主五癰邪結氣破石淋下血利小便水道

胡燕屎平○破五癰利小便

衣魚温○婦人疝瘕小便不利又療淋

亂髮微温○五癰關格不通利小便水道

蜀本淋石暖○主石淋水磨服之當得碎石隨溺出

藥對車前子寒主淋○主氣癰止痛利水道小便

茯苓平主淋利小便君

黃芩大寒主利小便臣○逐水利小腸

澤蔞寒主淋利三焦停水君○消渴淋瀝逐膀胱三

焦停水

小便淋



敗鼓皮平主利小便臣

冬瓜微寒主淋小便不通君○利小便止渴

桑螵蛸平主五淋利小便臣○通五淋利小便水下通

類證

豬苓平○利水道

石鷲寒○以水煮汁飲之治淋有效

海蛤平○治水氣浮腫下小便

藥性論

木通平○通利九竅

貝齒平○主五癰利水道

說者謂靈蘭秘典論言膀胱者州都之官津液藏焉氣化則能出矣故利小便者在用溫通以化膀胱之氣而巢氏則謂腎虛膀胱熱乃為淋兩說正相歧也



夫巢氏固云水入小腸下於胞行於陰爲溲便腎氣通於陰陰爲津液下流之道若腑藏不和則腎虛而膀胱熱熱則津液溲便遂數且澀淋瀝不宣故謂之爲淋矣而泰西家則言腎之情熱與溼膀胱之情冷與燥且言腰體之內有一穴以膜皮圍用爲吸取血絡脈絡綁縛絡使溺液流通乃以腰之驅德進於溺液之吸德下至膀胱而瀉焉則出雖由於膀胱而化氣則繫於腎腎之熱溼正所以和膀胱之冷燥且腎曰驅膀胱曰吸則是一藏一府緊相接遞相和者也若驅德不濟吸德遂優於是熱與溼者移於膀胱而道路不順津液內溢故小便如粟狀小腹弦急痛引

臍中以是篇中溫劑竟少而性寒者類以清膀胱之熱平者類以助腎之驅斯亦知彼說雖異而無不可通矣然謂淋家不可發汗發汗必便血何也請觀篇中所列衣魚亂髮論之夫血水同源竝藉心火蒸化其精者行於陰分爲血粗者行於陽分爲溺汗亦心之所布而徵之腎者也故曰腎主五液入心爲汗今心以強迫之劑必欲作汗而徵諸腎腎方困於膀胱之吸而不能驅其何能更輸將不爽於是心暴斂於下膀胱不勝誅求致所聚之熱所蓄之溺竝蒸迫化血下行矣亂髮之用能使水火合德而化氣故血源濬而水自通水道利而血自止衣魚之用能化水

溼於木氣閉塞中使從竅穴而達故去疝瘕卽以通水道利水道卽以消疝瘕淋家緣發汗而溺血惟是耳

自其疲罷而言謂之癢自其艱阻而言謂之淋癢

病也

說文

淋懍也小便難懍懍然也

釋名

癢之虛者溺多

汗多泣多唾多氣出而不反其實者溺秘汗秘目乾

舌乾氣結而不解此其所以然既見於疏證石韋下

矣而病源復列五淋之目曰熱曰冷曰氣曰沙曰勞

病則似不相兼治則多容相濟者蓋癢之虛近於淋

之勞與熱淋之沙與冷又近於癢之實且兩端皆有

因氣成病者則本篇之竝列五癢五淋非疊出亦非

混淆矣况言治癰之下不言治淋言治淋之下不言

治癰耶惟曰利小便曰利水道曰利小便水道曰逐

曰下則不得不縷析而鬯其義焉夫小便者水道

委水道者小便之源宜利小便者必源清而委不

宜利水道者必委道而源不繼利小便水道則通徹

源委之謂也又何難竟其義哉下降平聲也史記陳涉

索謂降之也史記酈食其傳逐從也楚詞河伯乘白

馳逐也文選南都賦流蕩也荀子儒效篇故風以是

論之下者因其不順脅之使順也逐者因其無力助

之推送也然則曰通曰利又何以別之夫通者對不

通而言利者能通而不能便利如指也是以篇中凡



言下言通者其物多有力而迅言利言逐者其物多
宛轉而和以此權衡藥之緩急卽以此科度病之虛
實則爲癰爲淋之差別自明而三焦膀胱之通塞順
逆自見矣

素問六節藏象論靈樞終始篇禁服篇咸謂人迎脈
大四倍曰格寸口脈大四倍曰關關爲溢陰格爲溢
陽人迎氣口脈竝大四倍曰關格關格之脈羸不能
極於天地之精則死皆言脈而不言證難經三難曰
關以前者陽之動遂上魚爲溢爲外關內格此陰乘
之脈也關以後者陰之動遂入尺爲覆爲內關外格
此陽乘之脈也三十七難曰邪在六府則陽脈不和

陽脈不和則氣留之氣留之則陽脈盛矣邪在五藏則陰脈不和陰脈不和則血留之血留之則陰脈盛矣陰氣太盛則陽氣不得相營故曰格陽氣太盛則陰氣不得相營故曰關關格者不能盡其命而死則明其理而猶未言其證仲景曰寸口脈浮而大浮爲虛大爲實在尺爲關在寸爲格關則不得小便格則吐逆跌陽脈伏而濇伏則吐逆水穀不化濇則食不得入名曰關格則言其證矣而與本篇所治尙未盡符巢元方曰關格者大小便不通也大便秘不通謂之內關小便不通謂之外格二便俱不通爲關格由於陰陽氣不和榮衛不通故關格則陰陽氣痞結腹

內脹滿氣不行於大小腸則大小便不通又風邪在
三焦三焦約則小腸痛內閉大小便不通日不得
後外臺秘要曰集驗云關格之病腸中轉痛不得
小便葛氏云卒關格大小便不通支滿欲死二三日
則殺人姚氏云風寒冷氣入腸忽痛堅急如吹狀大
小便不通或小腸有氣結如升大脹起名爲關格則
詳於證且與本篇之治合矣卻又不及乎衄紛紛諸
說遂可聯衄證爲一貫耶自其淺而言則衄較大四
倍爲何如狀不能極天地之精爲何如候豈得以大
小便不通一節概之殊不知由大小便不通而脹滿
由脹滿而大小便益不通上不得入下不得出又安

能呼吸天地精氣以爲生卽葛氏亦謂二三日則殺人又何能更盡其期以死若是猶以爲輕渺必立斃之證乃得爲甚耶雖然此非篇中瞿麥亂髮所治之關格也欲求瞿麥亂髮所治之關格則仲景所論其庶乎蓋寸口之脈浮爲氣虛大爲陽實在上則陽越而氣無以攝在下則氣餒而陽無以洩所謂陽實而不能化氣者也故曰在尺爲關在寸爲格關則不得小便格則吐逆觀乾薑黃連黃芩人蘘之治格卽可以悟治關之法矣而不曰不大便自固與脈偏大四倍已上者異也跗陽之脈伏爲陽鬱瀆爲絡虛陽鬱而欲達不得達則吐絡虛而陽不爲之行則腕中乾

而食不得入曰此爲關格則并不重在小便之不利而重在吐逆矣絡虛而氣不行陽實而氣不化其病皆涉於火瞿麥開火之府氣者也亂髮化火之藏者也藏氣化則血源濬而水自通火府開則水氣清而火自散故凡兩物之用固在岷之偏大偏小而實不得以四倍已上爲準其效固在通小便又實不得以大小便竝不通爲準且二物於關格之下竝繼以不通字樣則凡篇中別物下言其病曰不通言其效曰通者皆可以關格類推矣

小便利

牡蠣平微寒○澀大小腸止大小便

龍骨平微寒○縮小便

鹿茸温微温○主小便利

桑螵蛸平○夢寐失精遺溺

漏蘆寒大寒○止遺溺

土瓜根寒○止小便數不禁

雞胫胫微寒○主小便利遺溺除熱止煩

雞腸草微寒○止小便利

藥對 菖蒲温止小便君○止小便利

茛醬温主尿不節臣

證類 山茱萸平○通九竅止小便利

小便利實該小便多小便不禁小便數遺尿四證而



四證者惟小便數爲有熱餘則皆屬陽衰陽衰之中
又宜分作兩端如孩提之善遺尿是陽氣之未充也
老人之苦溺多至夜尤甚是陽之已竭也大抵小便
者根於腎行於膀胱膀胱者以氣爲用氣盛則中熱
而有紀律經行者不敢不受其節制氣弱則中寒而
不能自振經行者遂不受約束直達而過焉是故小
便數者約束太過也小便利者逕情直行也小便不
禁者醒而不能約束也遺尿者昏而不能約束也昏
而不能約束猶可俟醒醒而不能約束則直陽之億
矣然此皆常病可於方書覈證檢方以求愈者也此
篇所載則更有啓發元悟醒惕靈機者在焉篇中大

旨小便之行固恃夫陰陽之相化尤喫緊在土之泥
滲蓋惟其滲是以精華必留惟其滲是以形質必去
惟其當滲是以有藉夫陽惟其當滲是以有藉夫陰
陰者所以召陽使歸而行所當行止所當止陽者所
以布陰使漑而內沾五藏外透皮毛且客熱恃陰以
消孤陰恃陽以化相裒相益以底平成此不更於病
源千金外臺前加一曳綱振領乎况以水中多節之
物制水之無節便而不溺之物轉溺而不便之爲病
引而伸之觸類而長之醫中關鍵不益明瞭哉雖然
小便利之候不得兼渴也若兼渴則是消渴病而非
小便利矣

漏盧夫人知其能利水此則曰止遺溺小便利者其
患必在竅之通此則曰山茱萸能通九竅止小便利
又通五淋利小便水道者必與遺溺相違惟桑螵蛸
兩者兼治是焉知其能不適相反耶是三者皆當詳
其兼證按其氣化而明之夫漏盧春夏色白屆秋變
黑能化金爲水固治溼熱之物也乃主皮膚熱而有
惡瘡疽痔溼痹是外之熱不能入內以逐其溼內之
溼不能及外以和其熱矣膀胱者腎之表而肌膚又
膀胱之表倘其病表裏不相符而水道不利者是腎
虛膀胱熱用此正以除表熱而逐裏溼遺溺者是膀
胱虛冷不能約水用此正以挽外熱歸裏而約水山

茱萸花於仲春實於初夏必屆冬乃成味酸性平是
能挽金水以涵木回下降以爲升之物也乃主心下
邪氣寒熱逐寒溼痹是取其收中有發發中有收矣
而更治頭風風氣去來鼻塞目黃耳聾面皤而遺精
是其一竅過通而諸竅皆閉通其諸竅卽所以治一
竅之過通桑螵蛸深秋生子仲夏成形是隨陰之斂
謐而藏隨陽之昌熾而出矣本經以通五淋利小便
水道列於傷中疝瘕陰痿血閉之下是欲其化陰之
斂謐而從陽以出別錄以止失精遺溺列於男子虛
損五藏氣微之下是欲其化陽之昌熾而從陰以藏
三者雖同工而異調而中實有理焉如此

溺血

戎鹽寒 ○心腹痛溺血

蒲黃平 ○利小便止血消瘀血

龍骨平 微寒 ○主溺血

鹿茸温 微温 ○主溺血

乾地黄寒 ○主溺血利大小腸

葱涕平 ○主溺血

牛膝平 ○主惡血留結藥性論

車前子寒 ○葉主血瘦下血小便赤止煩下氣

柏子并葉平温

世之引經義言溺血者莫不以氣厥論胞移熱於膀



眊爲據特旣曰癰溺血則屬血淋非但溺血也血淋
必溺濇溺血必溺自如巢氏曰心主血血之行身通
徧經絡循環府藏勞甚則散失其常經溢滲入胞而
成血淋是熱淋之甚者推其源雖溺血之所由原不
外是別其類實通塞之殊致矣然則痿論所謂悲哀
太過則胞絡絕胞絡絕則陽氣內動發則心下崩數
洩血者可爲經義之準歟是固脈痿之源卻亦溺血
之嚆矣然因勞悴而生火與因七情而動陽其所從
來縱有久暫之殊而以陽搏陰實無彼此况胞脈者
屬心而絡於胞中證旣不能離胞情又不能離熱遂
謂其竟相懸絕可乎夫解結釋縛必摘其綱別嫌明

微須窮其目事固有本協黍銖末殊尋文者此血淋
溺血證必不可不別而治原無不可相同况溺血已
久續以急瀆急瀆先愈旋復溺血者甚多耶在此篇
之理固不必以此而費辭但欲明病之所由然則終
不得不詳乎此耳蓋血與水本同源而有凝釋之殊
其不歸經絡而自甘與水爲伍隨其流行坎止者不
特化源有愆常度必擁衛之土氣受盛之本氣均有
不循其職焉何但陰陽薄蝕水火迫蕩已哉是故從
水以凝之從土以泥之從陰以除其熱迫從陽以填
其漏卮而土泥之中復分從火中使之收攝從水中
使之和諧兩塗其所以如此者緣靈素於此旣言之

未詳後世復無有推明之者千金外臺雖列多方然亦不述其源惟孫氏於第一方提明房勞傷中尿血夫房勞而致傷中必亦祇係胞脈之不咸彼之悲哀動中者能使胞脈閉而月事不來則此之胞脈開而血常自下者自必因恣樂之過極不參覈至是恐不特不能了此篇之旨卽千金外臺諸方亦未能取之左右逢源矣溺血云乎哉

本經序疏要卷二